

**Sud Bosne i Hercegovine**
Суд Босне и Херцеговине

Broj: S1 3 Iž 039466 21 Iž
Sarajevo, 12.01.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Srete Crnjak, predsjednik vijeća, Dinke Bešlagić-Čovrk i Vesne Trifunović, članovi vijeća, odlučujući o žalbi političkog subjekta HDZ BiH-Hrvatska demokratska zajednica BiH, sa sjedištem u Mostaru ulica Kneza Domagoja bb, kojeg zastupa predsjednik Dr. Dragan Čović, izjavljenoj protiv zaključka Centralne izborne komisije Bosne i Hercegovine broj: 05-1-07-5-22-2/21 od 08.01.2021.godine, u nejavnoj sjednici, održanoj dana 12.01.2021.godine, donio je

R J E Š E N J E

Žalba se odbija kao neosnovana.

O b r a z l o ž e n j e

Zaključkom Centralne izborne komisije Bosne i Hercegovine, broj: 05-1-07-5-22-2/21 od 08.01.2021.godine, odbačen je prigovor političkog subjekta HDZ BiH-Hrvatska demokratska zajednica BiH kao nedopušten.

Protiv navedene odluke žalitelj je blagovremeno izjavio žalbu zbog proizvoljne primjene materijalnog prava, bitne povrede pravila upravnog postupka i pogrešno utvrđenog činjeničnog stanja.

U žalbi navodi da je prema odredbi člana 3.6 st. 1. Izbornog zakona BiH CIK BiH odgovoran za tačnost, ažurnost i ukupni integritet propisa. Žalitelj naglašava da je više puta ukazivao na nepravilnosti u pogledu fiktivnih prijava, sve sa ciljem kako bi promjenom biračke strukture uticali na konačni ishod izbora, što je najkarakterističnije za Izbornu jedinicu Jug koja daje dva vijećnika u Gradsko vijeće i u kojem je sa relevantno manjim brojem glasova moguće uticati na krajnji rezultat. Postoji osnovana sumnja da su se pojedini birači protivzakonito prijavili na nove adrese stanovanja kako bi učestvovali na tačno određenim biračkim mjestima. Takođe navodi da je u naprijed navedenoj izornoj jedinici „Hrvatskoj demokratskoj zajednici BiH“ dodijeljen jedan mandat kao i „Koaliciji za Mostar 2020-SDA-SBB-SbiH-BPS-S.H. te imajući u vidu ukupan broj glasova koji je podnositelj žalbe osvojio

(2.619) proizilazi da je trebao osvojiti i drugi mandat. Žalitelj ne osporava činjenicu da se izvodi iz Centralnog biračkog spiska za glasanje na izborima sačinjavaju na osnovu evidencija prebivališta državljana BiH koji vode nadležna ministarstva unutrašnjih poslova BiH, ali da spomenuta nadležnost, Centralnu izbornu komisiju BiH ne oslobađa odgovornosti. Obrazloženje pobijanog zaključka ne sadrži odlučujuće razloge iz kojih proizilazi Odluka o odbacivanju prigovora kao nedopuštenog.

Predlaže da se žalba uvaži, poništi pobijani zaključak i Odluka o utvrđivanju i objavljivanju rezultata Lokalnih izbora 2020. godine u Gradu Mostaru o kojoj je Zaključkom odlučivano, te naloži CIK BiH raspisivanje ponovnih izbora za izbornu jedinicu 4 (Jug) Grada Mostara, a podredno da se pobijani zaključak i Odluka ponište te se naloži CIK BiH postupanje po članu 3.6 st.2. Izbornog zakona.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema shvatanju apelacionog vijeća, pobijani zaključak Centralne izborne komisije BiH broj: 05-1-07-5-22-2/21 od 08.01.2021.godine kojim se odbacuje prigovor političkog subjekta HDZ BiH-Hrvatska demokratska zajednica BiH kao nedopušten, je zasnovan na pravilnoj primjeni materijalnog prava, a razloge za donošenje iste u cjelosti prihvata i ovo vijeće.

Izvodi iz Centralnog biračkog spiska za glasanje na izborima za 2020. godinu su sačinjeni na osnovu evidencije prebivališta državljana Bosne i Hercegovine koje vodi u konkretnom slučaju Ministarstvo unutrašnjih poslova Hercegovačko-neretvanskog kantona, u skladu sa Zakonom o prebivalištu i boravištu državljana BiH, Zakona o jedinstvenom matičnom broju, Zakona o ličnoj karti državljana BiH. Njihova dužnost je i da sve promjene koje utiču na ažurnost Centralnog biračkog spiska dostave Agenciji za identifikacione dokumente, evidenciju i razmjenu podataka Bosne i Hercegovine (IDDEEA), organu koji tehnički održava evidenciju Centralnog biračkog spisak u skladu sa odredbom člana 3.5 stav (5) Izbornog zakona BiH.

Odredba člana 3.3 Izbornog zakona BiH (Sl.glasnik BiH broj 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 39/08, 32/10, 18/13, 7/14, 31/16 i 41/20) propisuje da se Centralni birački spisak sačinjava i vodi na osnovu podataka iz službenih evidencija o prebivalištu i boravištu državljana BiH koje vode nadležni državni organ, drugih javnih isprava i službenih evidencija o državljanima BiH koje vode CIK BiH i drugi nadležni organi i na osnovu javnih isprava i podataka koje dobiju neposredno od građana.

Odredbom člana 3.5 stav (2) Izbornog zakona Bosne i Hercegovine je propisano da Centralna izborna komisija BiH vodi Centralni birački spisak za teritoriju Bosne i Hercegovine na osnovu evidencije nadležnog državnog organa koji vodi registar građana Bosne i Hercegovine u skladu sa Zakonom o centralnoj evidenciji i razmjeni podataka, osim ako ovim Zakonom nije drugačije određeno.

Shodno navedenom izvodi iz Centralnog biračkog spiska za glasanje na izborima se sačinjavaju, pored drugih zakonom propisanih uslova, na osnovu evidencija

prebivališta državljana Bosne i Hercegovine koje vode nadležna ministarstva unutrašnjih poslova u Bosni i Hercegovine, koja su odgovorna za ažurnost i ispravnost navedene evidencije.

Odredbom člana 2.10 Izbornog zakona Bosne i Hercegovine propisano je da će Centralna izborna komisija poništiti izbore u izornoj jedinici ili na nekom drugom biračkom mjestu, ako ustanovi da je za vrijeme glasanja ili brojanja glasačkih listića došlo do nepravilnosti koje mogu uticati na rezultate izbora.

Iz navedene odredbe jasno proizilazi da Centralna izborna komisija može poništiti izbore samo pod uslovom, da je za vrijeme glasanja ili brojanja glasačkih listića došlo do nepravilnosti koje mogu uticati na rezultate izbora.

U konkretnom slučaju Centralna izborna komisija nije mogla zahtjev žalitelja cijeliti ni kao inicijativu za primjenu odredbe člana 2.10 Izbornog zakona BiH po službenoj dužnosti, s obzirom da žalitelj ukazuje na povelje koje se tiču biračke strukture, odnosno biračko pravo za osobe sa fiktivno prijavljenim prebivalištem, što ne predstavlja ni jedan uslov za poništenje izbora iz citirane odredbe navedenog zakona.

Prigovor žalitelja koji se odnosi na osobe sa fiktivno prijavljenim prebivalištem, mogu biti samo u vezi sa Izvodom iz Centralnog biračkog spiska za čiju ažurnost su odgovorna ministarstva unutrašnjih poslova u Bosni i Hercegovini, a u konkretnom slučaju Ministarstvo unutrašnjih poslova Hercegovačko-neretvanskog kantona.

Ovu činjenicu potvrđuje i sama krivična prijava Hrvatskog narodnog sabora BiH broj: 1-22/20 od 19.12.2020.godine podnesena Kantonalnom tužilaštvu Hercegovačko-neretvanskog kantona Mostar, koji je jedini nadležni organ da izvrši provjere po sumnjama podnosioca žalbe, u konkretnom slučaju, na nezakonit rad ministarstva unutrašnjih poslova Hercegovačko-neretvanskog kantona, kao i da su se pojedini birači (većinom bošnjačke nacionalnosti) prijavili fiktivno na nove adrese stanovanja.

Kako nije ispunjen ni jedan od uslova iz odredbe člana 2.10 Izbornog zakona BiH, za poništenjem izbora u izornoj jedinici 4 (Jug) Mostar, žalbom se neosnovano ukazuje da obrazloženje pobijanog Zaključka ne sadrži odlučujuće razloge zbog kojih je donesena odluka o odbacivanju zahtjeva kao nedopuštenog.

Iz navedenih razloga apelaciono vijeće nalazi da je pobijani zaključak Centralne izborne komisije Bosne i Hercegovine pravilan i zakonit, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
S U D I J A**

Sreto Crnjak